

समे – 12:25 hrs.

<><><><><><>

### Waqf Bill

वक्फ संशोधन बिल गी बैहस ते पास करोआने लेई अज्ज लोकसभा च पेश कीता गेआ ऐ। अज्ज इस सरबंथै च मीडिया कन्नै गल्लबात करदे होई संसदी कार्य मंत्री किरेन रिजिजू होरें गलाया जे अज्जै दा ध्याड़ा ऐतिहासिक ऐ, कीजे अज्ज वक्फ संशोधन बिल 2025 गी लोकसभा च पेश कीता जा रदा ऐ। उ'नें मेद बुज्झी जे राष्ट्र-हित च आहन्ने जा'रदे इस बिल दा समर्थन नां छड़ा लक्खां-बद्धे मुसलमानें आसेआ सगुआं पूरे देसै आसेआ कीता जाहग। उ'नें आखेआ जे सरकार गरीब मुसलमानें, महिलाएं ते बच्चें दे कल्याण सने राष्ट्र हित आहली हर इक पैहलकदमी लेई वचनबद्ध ऐ। जित्थे इक बक्खी बरोधी धड़ा वक्फ बिल दे खलाक इकजुट होए दा ऐ उत्थे गै सब्भनें बड्डी सियासी पार्टिएं अपने सदस्यें गी व्हिप जारी करिये अज्ज लोकसभा च मजूदा रौहने लेई आखे दा ऐ। उ'आं सरकार दा आखना ऐ जे इस बिल दा मुंडला मकसद वक्फ दिएं संपत्तिएं दे प्रबंधन ते संचालन सरबन्धी कमिएं गी दूर करना ऐ।

<><><><><><>

### Home Minister

केन्द्री गृह मंत्री अमित शाह होर औंदी 7 ते 8 अप्रैल गी सुरक्षा हालात दा जायजा लैने ते सुरक्षाबलें कन्नै गल्लबात लेई जम्मू-कश्मीर दे दौरे पर आवै करदे न। आकाशवाणी दे जम्मू

संवाददाता दी रिपोर्ट मूजब, शाह होर कानून बवस्था दी मजूदा स्थिति दा आंकलन करने दे मकसद कन्नै इक उच्ची सतह दी सुरक्षा जायजा बैठक दी प्रधानता करडन। इस मौके पर आतंकवाद-रोधी अभियानें, बन्ने पारा थमां घुसपैठ दिएं कोशशें ते जम्मू-कश्मीर दे पूरे-पराते सुरक्षा हालात उप्पर मुख करी चर्चा कीते जाने दी मेद ऐ। तोआई मुखमंत्री ओमर अब्दुल्ला होरें आखेआ ऐ जे गृह मंत्री होर प्रदेश दे अपने दौरें दरान केई विकास परियोजनाएं दा उद्घाटन बी करडन ते उंदा एह दौरा छड़ा सुरक्षा हालात दा जायजा लैने पर गै केन्द्रित नेई होग।

<><><><><><>

#### New Criminal Laws

केन्द्र सरकार नै जम्मू-कश्मीर च त्रै नमें अपराधिक कानूनों दी मुकम्मल अमल-आवरी जकीनी बनाने लेई कमेटियां खडेरियां न। आकाशवाणी दे जम्मू संवाददाता दी रिपोर्ट मूजब, केन्द्री गृह राज्यमंत्री नित्यानंद राय होरें लोकसभा च इक सोआलै दे लिक्खियै दिते गेदे परते च एह जानकारी सांझी कीती जे केन्द्र सरकारै, जम्मू-कश्मीर दे मुख सचिव हुंदी प्रधानता तैहत इक संचालन कमेटी ते पुलसा दे डैक्टर जनरल हुंदी प्रधानता आहली इक बाअखितयार कमेटी खडेरी ऐ। ध्यानजोग ऐ जे नमें अपराधिक कानूनों दा डोगरी, कश्मीरी ते उर्दू च अनुवाद पूरा करी लैता गेदा ऐ। जम्मू-कश्मीर पुलसा दे जांच अधिकारिएं लेई ई-साक्ष्य सने अपराध ते अपराधिएं दी ट्रैकिंग सरबन्धी नेटवर्क प्रणाली आहले कम्ममें गी चालू करी दिता गेदा ऐ। एहदे

अलावा त्रै नमें अपराधिक कानूनों मतल्लक सब्भनैं लोड़चदे नियमें, अधिसूचनाएं ते प्रशासनिक आदेशें गी बी जारी करी दिता गेदा ऐ।

<><><><><><>

## Un Office

लेफ्टिनेंट गवर्नर मनोज सिन्हा होरें आखेआ ऐ जे श्रीनगर च संयुक्त राष्ट्र दे दफ्तरै दी हून लोड़ नेई ऐ पर कन्नै गै उ'नें इब्बी साफ करी दिता ऐ जे एह मामला विदेश मंत्रालय दे अख्तियार हेठ औंदा ऐ ते इस सरबंध्यै च फैसला बी विदेश मंत्रालय आसेआ गै लैता जाई सकदा ऐ। एलजी होर इक निजी समाचार समूह कन्नै इंटरव्यू दरान पुच्छे गेदे सोआलै दा परता देआ करदे हे। उ'नेंगी पुच्छेआ गेआ हा जे श्रीनगर च हून हालात च खरा मता सुधार होई गेदा ऐ ते मसला हून जम्मू-कश्मीर नेई सगुआं पाकिस्तान दे नजैज कब्जे आहला जम्मू-कश्मीर ऐ, ते क्या एहदे मददेनजर घाटी च हून संयुक्त राष्ट्र दा दफ्तर बंद करी दिता जाना लोड़चदा ऐ। एहदे पर श्री सिन्हा होरें गलाया जे एह मामला उं'दे अख्तियार हेठ नेई औंदा ते एहदे पर मते बेहतर ढंग'नै परता विदेश मंत्रालय आसेआ दिता जाई सकदा ऐ।

<><><><><><>

## Billawar

जंदे सोमवारें रातीं कठुआ जिले च सुरक्षाबलें ते आतंकवादिं बशकार होई दी भारी गोलीबारी दे मगरा, सुरक्षाबलें घाटी ते बिलावर दिं प्हाड़िं बशकार पौंदे पंजतीर्थी इलाके च अपने तुपाई अभियान बरोबर जारी रक्खे दे न। एह आतंकवादिं जंदे शनिवारें जखोल इलाके च रूई गां थमां बचियै नस्सी गे हे। जम्मू-कश्मीर पुलसा दे डरैक्टर जनरल नलिन

प्रभात ते आईजीपी भीम सेन टूटी होरें कल बिलावर दे नेड़े पंजतीर्थी इलाके दा दौरा लाइयै त्रै आतंकवादिएं दे सफाये लेई जारी अभियान दा जायजा लैता। फौज, एनएसजी, जम्मू-कश्मीर पुलसा, एसओजी ते नीम फौजी बलें असेआ घाटी, पंजतीर्थी ते बिलावर दे जांगली इलाकें च तुपाई अभियान चलाए जा'रदे न। ध्यानजोग ऐ जे जंदे हफ्ते हीरानगर सैक्टर दे सान्याल ग्रांs दे बसनीकें 5 आतंकवादिएं गी दिक्खेआ हा। मगरा जिले दे साफियान जखोल च इ'नें आतंकवादिएं दा पता लग्गा ते फही छिड़े दे टाक्करे च सुरक्षाबलें 2 आतंकवादिएं गी मारी-मुकाया हा जिसलै के 4 पुलसकर्मी इस कार्रवाई दुरान शहीद होई गे हे।

<><><><><><>

#### Cyber Cell Rajouri

जिला पुलस रजौरी दे साईबर सैल नै रजौरी, नौशैह्वा, कालाकोट ते थन्नामंडी आहले पुलस थानें च दर्ज बक्ख-बक्ख चाल्ली दिएं 8 शकैतें पर कार्रवाई करदे होई 3 लक्ख 72 जहार 192 रुपें दी रकम, जालसाझ-ठगें थमां कामयाबी कन्नै बरामद कीती ऐ। आकाशवाणी दे रजौरी संवाददाता शक्तिपाल शर्मा मूजब, रजौरी दे एसएसपी गौरव सिकरवार होरें आम लोकें गी इक बारी फही एह् अपील कीती ऐ जे ओह् मते सौहगे-सतर्क रौहन ते ऑनलाईन ठगी होने दी सूरतें च तुरत एहदी रिपोर्ट राश्ट्री हेल्पलाईन नम्बर 1930 पर करन।

<><><><><><>